



DISPOSICIÓN ADICIONAIS

VIII. DISPOSICIÓNS ADICIONAIS

Disposición adicional primeira. *Información ao Parlamento*

Un. A Consellería de Facenda facilitaralle trimestralmente á Comisión de Economía, Facenda e Orzamentos do Parlamento información referida ás seguintes actuacións:

- a) As ampliacións de crédito realizadas para atender o pagamento de obrigas derivadas de crebas de operacións de crédito avaladas pola comunidade autónoma.
- b) As operacións de endebedamento por prazo superior a un ano, formalizadas pola comunidade autónoma, os seus organismos autónomos, as axencias públicas autonómicas ou as restantes entidades instrumentais do sector público autonómico, conforme as autorizacións contidas nesta lei.
- c) Os avais amortizados, os pagamentos efectuados por falidos, os importes recuperados e o risco acumulado, tanto no que respecta aos avais concedidos pola comunidade autónoma coma aos concedidos polas entidades instrumentais do sector público autonómico.
- d) As autorizacións de revisións de prezos en concertos ou convenios que superen o incremento do índice de prezos ao consumo.
- e) A enumeración nominal e individualizada das concesións de subvencións ou axudas autorizadas polo Consello da Xunta a que se refire artigo 26.3 da Lei 9/2007, do 13 de xuño, de subvencións de Galicia.

Dous. A Consellería de Facenda comunicaralle á Comisión de Economía, Facenda e Orzamentos do Parlamento, nun prazo de trinta días:

- a) A realización das adaptacións técnicas dos orzamentos autorizadas consonte o previsto na letra p) do artigo 5 desta lei.
- b) As modificacións efectuadas conforme o indicado no artigo 9.
- c) Os orzamentos dos organismos autónomos, das axencias públicas autonómicas, das entidades públicas empresariais e das sociedades mercantís públicas autonómicas que poidan entrar en funcionamento ao longo de 2018.

Tres. A Sociedade Pública de Investimentos de Galicia, S.A., ou entidade que se subrogue na súa posición, comunicará mensualmente á Comisión de Economía, Facenda e Orzamentos do Parlamento os plans económico-financeiros que subscriba no desenvolvemento da súa actividade.

Disposición adicional segunda. *Porcentaxes de gastos xerais de estrutura de contrato de obra*

En virtude da previsión establecida no artigo 131.1 do Regulamento Xeral da Lei de Contratos das Administracións Públicas, aprobado polo Real decreto 1098/2001, do 12 de outubro, determinase, con carácter uniforme para todos os contratos de obra que concerten os órganos de contratación da Administración xeral da comunidade autónoma e do seu sector público, a seguinte distribución de gastos xerais de estrutura que sobre eles inciden:

- a) O 13 por cento en concepto de gastos xerais da empresa, gastos financeiros, cargas fiscais (Imposto sobre o Valor Engadido excluído), taxas da administración, que inciden sobre o custo das obras e demais derivados das obrigas do contrato.
- b) O 6 por cento en concepto de beneficio industrial do contratista.

Disposición adicional terceira. *Autorización de orzamentos en entidades instrumentais de nova creación*

Autorízase o Consello da Xunta de Galicia, por proposta da Consellería de Facenda, a aprobar os orzamentos de explotación e capital das entidades públicas instrumentais con orzamento estimativo que se constitúan ou entren en funcionamento ao longo do ano 2018.

Disposición adicional cuarta. *Adecuación dos estados financeiros das entidades instrumentais*

Os órganos de goberno das entidades públicas empresarias, sociedades mercantís públicas autonómicas, fundacións do sector público autonómico e demais entidades con orzamento estimativo incluídas no ámbito de aplicación desta lei, deberán adecuar os orzamentos de explotación e capital, e demais estados financeiros ás transferencias de financiamento consignadas nos estados de gastos desta lei no prazo de un mes dende a entrada en vigor desta norma.

Disposición adicional quinta. *Orzamento inicial das axencias públicas autonómicas e requisitos de creación*

Un. Para as axencias públicas que se poidan constituír ata o 31 de decembro do ano 2018 e asuman funcións doutros centros directivos, organismos ou entidades, o Consello da Xunta de Galicia, por proposta da persoa titular da Consellería de Facenda e por iniciativa da consellaría da que dependa a axencia pública, establecerá as dotacións do seu orzamento inicial.

O orzamento financiarase mediante a minoración dos créditos que teña atribuídos o centro, organismo ou entidade cuxas funcións asuma, sen que supoña un incremento do gasto público, e terá a vinculación orzamentaria establecida para axencias na normativa vixente en materia de réxime financeiro e orzamentario de Galicia.

Dous. Con todo, cando a axencia que se constituía asuma na súa totalidade funcións dun organismo autónomo, procederase á adaptación do orzamento do organismo ao previsto para as axencias na normativa vixente en materia de réxime financeiro e orzamentario de Galicia, de conformidade co seguinte:

- a) A vinculación do orzamento a partir da entrada en vigor do estatuto da axencia será a prevista para as axencias na normativa vixente en materia de réxime financeiro e orzamentario de Galicia.
- b) Para incorporar ao orzamento do organismo os recursos e as dotacións correspondentes ás operacións comerciais que, de ser o caso, realice, tramitarase un expediente de modificación orzamentaria que autorizará a persoa titular da Consellería de Facenda, manténdose o equilibrio orzamentario.

Tres. No caso de que polas datas de aprobación dos estatutos, ou por calquera outra circunstancia que dificulte a aplicación do disposto nas alíneas anteriores, se considere procedente non alterar durante o ano 2018 a estrutura e o réxime orzamentario dos centros ou organismos afectados, esta circunstancia farase constar no decreto polo que se aprobe o correspondente estatuto.

Disposición adicional sexta. *Prestacións familiares por coidado de fillos*

Aquelas persoas que, na data do 1 de xaneiro de 2018, teñan ao seu cargo fillas ou fillos menores de tres anos terán dereito a percibir unha prestación de 360 euros pola primeira filla ou fillo, de 1.200 euros pola segunda ou segundo e de 2.400 euros polo terceiro e sucesivos, nas condicións que estableza a Consellería de Política Social.

Disposición adicional sétima. *Alleamento de solo empresarial polo Instituto Galego da Vivenda e Solo*

Autorízase o Instituto Galego da Vivenda e Solo, nos supostos de alleamento de terreos destinados á creación de solo industrial e residencial, así como a parcelas ou a polígonos empresariais ou residenciais terminados que se realicen a favor das sociedades públicas con participación maioritaria polo anterior organismo, para que o alleamento se poida efectuar con pagamento aprazado non superior a dez anos e sen repercusión de xuros.

Disposición adicional oitava. *Prestacións extraordinarias para beneficiarios de pensións e subsidios non contributivos*

No ano 2018 as persoas beneficiarias de pensións de xubilación e invalidez na súa modalidade non contributiva, de pensións do Fondo de Asistencia Social e do subsidio de garantía de ingresos mínimos terán dereito á percepción dunha prestación única non superior a 210 euros, nas condicións que estableza o Consello da Xunta por proposta da consellaría con competencias en materia de benestar social.

Disposición adicional novena. *Centros concertados*

Un. No ámbito do ensino privado concertado mantense a suspensión do Acordo de 24 de abril de 2008, polo que se autoriza o asinamento do acordo entre a Consellería de Cultura, Educación e Ordenación Universitaria, as organizacións patronais e as organizacións sindicais do ensino privado concertado da Comunidade Autónoma de Galicia sobre condicións laborais, e a calidade do ensino, publicado mediante Resolución do 15 de maio de 2008, no relativo ao establecido na súa cláusula terceira sobre o incremento interanual do 2 % no complemento retributivo da comunidade autónoma e o incremento de 45 euros brutos mensuais para todo o profesorado en pagamento delegado e xornada completa.

Dous. No caso dos centros concertados, se se aprobase algún incremento nas contías dos módulos estatais de distribución de fondos públicos para o seu sostemento, aplicarase a mesma variación porcentual aos módulos fixados no anexo IV desta lei.

Disposición adicional décima. *Modificación dos cadros de persoal do Servizo Galego de Saúde*

Correspóndelle ao Servizo Galego de Saúde a autorización das modificacións, dentro de cada centro de xestión, dos cadros de persoal estatutario, de persoal MIR e de calquera outro tipo de persoal de institucións sanitarias dependentes do organismo non incluídos nas relacións de postos de traballo, sempre que a modificación acordada non supoña un incremento dos créditos do artigo correspondente do devandito centro.

En idénticas condicións correspóndelle ao Servizo Galego de Saúde a autorización da modificación prevista no parágrafo anterior dos cadros de persoal funcionario sanitario pertencentes ás clases de médicos/as, practicantes e matronas titulares.

En todo caso, daráselle conta á Consellería de Facenda unha vez tramitada a correspondente modificación.

Disposición adicional décimo primeira. *Persoal contratado ao abeiro do Plan Nacional de Formación e Inserción Profesional*

O Persoal contratado ao abeiro do Plan Nacional de Formación e Inserción Profesional (Plan FIP) nos centros de formación profesional ocupacional dependentes da Xunta de Galicia que continúe prestando servizos como persoal laboral indefinido en cumprimento dunha resolución xudicial que declarase a devandita condición, percibirá durante os períodos en que exerza a dita actividade as retribucións establecidas para o grupo profesional do convenio colectivo único para o persoal laboral da Xunta de Galicia que lle correspondera en función da titulación mínima requirida do curso que imparta. No caso de que non exista categoría laboral concreta equiparable, aplicaráselle as retribucións xenéricas do grupo respectivo; e nos grupos III, IV e V as mínimas do grupo profesional.

Disposición adicional décimo segunda. *Medidas en relación co V Convenio colectivo único para o persoal laboral da Xunta de Galicia e o Acordo polo que se establecen as condicións especiais de traballo do persoal do Servizo de Prevención e Defensa contra os Incendios Forestais da Xunta de Galicia*

Durante o ano 2018 quedará suspendida a aplicación do artigo 19 do V Convenio colectivo único para o persoal laboral da Xunta de Galicia. Ademais durante as épocas de perigo baixo, quedará suspendido o primeiro parágrafo do punto 3.3.8 do acordo polo que se establecen as condicións especiais de traballo do persoal do Servizo de Prevención e Defensa contra os Incendios Forestais (SPDCIF) da Xunta de Galicia

Disposición adicional décimo terceira. *Normas de especial aplicación en materia de recursos educativos complementarios de ensino público*

Durante o exercicio económico do 2018 non serán aplicables aos contratos, convenios e demais expedientes de gastos que dan soporte aos recursos educativos complementarios do ensino público galego as actualizacións dos prezos, derivadas da variación de prezos ao consumo (IPC galego) anual, así como de calquera outra fórmula de revisión prevista normativa ou convencionalmente.

Concretamente, as contías globais derivadas da aplicación aos citados contratos e convenios do índice de prezos ao consumo do exercicio 2018, así como das contías

globais pendentes dos exercicios 2013, 2014, 2015, 2016 e 2017, serán aboadas de xeito proporcional ao longo dos exercicios 2019 e 2020, de acordo exclusivamente coa fórmula e as porcentaxes que se dispoñan nas correspondentes leis de orzamentos galegas, actualizándose os prezos correspondentes ao exercicio 2019 tomando como referencia para o cálculo os prezos do exercicio base 2018 sen actualizacións.

Para a determinación destas contías globais empregarase a seguinte fórmula.

$$Q = N1 + N2 + N3 + N4 + N5 + N6$$

Onde Q será o importe a que ascende a contía global pendente dos exercicios anteriores.

N1 será o resultado de aplicarlle a variación do + 2,6 % á que ascende a taxa de variación anual do IPC Galego de 2012, aos prezos existentes a 31/12/2012, segundo o previsto na normativa contractual ou convencional que lle resulte de aplicación, multiplicado polos días de prestación do servizo durante o ano 2013.

N2 será o resultado de aplicarlle a variación do + 0,5 % á que ascende a taxa de variación anual do IPC Galego de 2013, aos prezos do exercicio base 2013 sen actualizacións, segundo o previsto na normativa contractual ou convencional que lle resulte de aplicación, multiplicado polos días de prestación do servizo durante o ano 2014. Os prezos do exercicio base 2013 sen actualizacións son os prezos existentes a 31/12/2013.

N3 será o resultado de aplicarlle a variación do - 1,0 % á que ascende a taxa de variación anual do IPC Galego de 2014, aos prezos do exercicio base 2014 sen actualizacións, segundo o previsto na normativa contractual ou convencional que lle resulte de aplicación, multiplicado polos días de prestación do servizo durante o ano 2015. Os prezos do exercicio base 2014 sen actualizacións son os prezos existentes a 31/12/2014

N4 será o resultado de aplicarlle a variación do - 0,2 % á que ascende a taxa de variación anual do IPC Galego de 2015, aos prezos do exercicio base 2015 sen actualizacións, segundo o previsto na normativa contractual ou convencional que lle resulte de aplicación, multiplicado polos días de prestación do servizo durante o ano 2016. Os prezos do exercicio base 2015 sen actualizacións son os prezos existentes a 31/12/2015.

N5 será o resultado de aplicarlle a variación do + 1,6 % á que ascende a taxa de variación anual do IPC Galego de 2016, aos prezos do exercicio base 2016 sen actualizacións, segundo o previsto na normativa contractual ou convencional que lle resulte de aplicación, multiplicado polos días de prestación do servizo durante o ano 2017. Os prezos do exercicio base 2016 sen actualizacións son os prezos existentes a 31/12/2016.

N6 será o resultado de aplicarlle a variación do porcentaxe á que ascenda a taxa de variación anual do IPC Galego de 2017, aos prezos do exercicio base 2017 sen actuali-

zacións, segundo o previsto na normativa contractual ou convencional que lle resulte de aplicación, multiplicado polos días de prestación do servizo durante o ano 2018. Os prezos do exercicio base 2017 sen actualizacións son os prezos existentes a 31/12/2017.

Disposición adicional décimo cuarta. *Adaptación do Título II desta Lei ao establecido na normativa básica estatal.*

Un.- As retribucións do persoal do sector público recollidas no anexo de persoal para o ano 2018 corresponden co establecido na Lei 3/2017, de 27 de xuño, de Orzamentos Xerais do Estado para o ano 2017.

Dous.- As previsións recollidas na presente lei relativas ao réxime e condicións retributivas do persoal ao servizo do sector público autonómico deberán adecuarse ás normas que con carácter básico se inclúan na disposición que, no seu caso, articule a correspondente prórroga dos Orzamentos Xerais do Estado e, en todo caso, na Lei de Orzamentos Xerais do Estado para o ano 2018.

A adecuación das retribucións efectuarase aplicando a porcentaxe máxima e as condicións que estableza a dita normativa básica.

Tres.- Para a aplicación do artigo 12 desta Lei a oferta pública de emprego ou outro instrumento similar de xestión da provisión de necesidades de persoal, adaptarase aos límites máximos e restantes requisitos que se establezan na normativa básica estatal.

Disposición adicional décimo quinta. *Retribucións dos consellos de administración*

No ano 2018 as retribucións dos consellos de administración das sociedades mercantís públicas ou das entidades públicas empresariais non experimentarán incremento respecto das vixentes o 31 de decembro de 2017.

Disposición adicional décimo sexta. *Prestación de axuda económica a través da tarxeta benvida*

As familias que no ano 2018 teñan un fillo ou filla ou adopten un neno ou nena menor dun ano, terán dereito a percibir unha axuda económica de 1.200 € durante o primeiro ano de vida do fillo ou filla nas condicións que estableza a consellería con competencia en materia de benestar social. No caso de adopción ou garda con fins adoptivos o dereito á percepción da axuda producirase desde o mes en que se emita a resolución administrativa ou xudicial e ata que o neno ou nena cumpra un ano.

Para as familias con poucos recursos económicos esta axuda estenderase nas sucesivas anualidades e ata que o fillo/a cumpra tres anos nas condicións que estableza a Consellería de Política Social.

Disposición adicional décimo sétima. *Remisión e control de información económico-financeira*

Un. Todas as entidades pertencentes ao sector público autonómico segundo a definición que realiza a Lei 16/2010, de organización e funcionamento da Administración xeral e do sector público autonómico de Galicia, e todas as entidades clasificadas como "Administracións Públicas" segundo a definición que realiza o Sistema Europeo de Contas Estatais e Rexionais (SEC2010) está obrigadas a remitir á Intervención Xeral da Comunidade Autónoma a información prevista na Lei Orgánica 2/2012, do 27 de abril, de Estabilidade orzamentaria e Sustentabilidade financeira e na súa normativa de desenvolvemento, nos termos e prazos que lle sexa requirida por esta.

As entidades non incluídas no parágrafo anterior, calquera que sexa a súa forma e natureza xurídica, que teñan a súa sede na Comunidade Autónoma de Galicia están obrigadas a remitir á Intervención Xeral da Comunidade Autónoma a información que esta lles requira a efectos de analizar a súa posible clasificación como "administración pública" segundo os criterios fixados no Sistema Europeo de Contas Estatais e Rexionais (SEC2010).

Dous. A efectos de garantir a exactitude e coordinación da información económico-financeira subministrada pola Administración xeral e os organismos autónomos, a Intervención Xeral da Comunidade Autónoma verificará mediante técnicas de auditoría que os datos e información con transcendencia económica proporcionados polos órganos xestores como soporte da información contable reflectan razoablemente as operacións derivadas da súa actividade. A Intervención Xeral da Comunidade Autónoma establecerá o procedemento, alcance e periodicidade das actuacións que se deban desenvolver.

As auditorías das contas anuais das axencias públicas autonómicas e dos consorcios adscritos á Comunidade Autónoma, realizaranse pola Intervención Xeral da Comunidade Autónoma de conformidade co procedemento previsto no título V do Texto refundido da Lei de réxime financeiro e orzamentario de Galicia, aprobado por Decreto legislativo 1/1999, do 7 de outubro.

Para a execución das auditorías de contas anuais, a Intervención Xeral da Comunidade Autónoma poderá, en caso de insuficiencia de medios propios dispoñibles, solicitar a colaboración de empresas privadas de auditoría, que deberán axustarse ás normas e instrucións que determine aquela. A contratación da colaboración nos traballos de auditoría de contas anuais das axencias e dos consorcios que en cada caso sinálese, será realizada pola Consellería de Facenda.

Toda contratación de empresas privadas de auditoría, no ámbito sinalado anteriormente, deberá ir precedida, con carácter anual, dunha orde por parte da Consellería de Facenda, na que se especificará a insuficiencia dos servizos da Intervención Xeral da Comunidade Autónoma que xustifique dita contratación.

Os auditores serán contratados por un prazo máximo de dous anos, prorrogable por outros dous, non podendo superarse os oito anos de realización de traballos sobre unha mesma entidade a través de contratacións sucesivas, incluídas as súas correspondentes prórrogas, nin podendo aos devanditos efectos ser contratados para a realización de traballos sobre unha mesma entidade ata transcorridos dous anos desde a finalización do período de oito anos antes referido.

As sociedades de auditoría ou auditores de contas individuais concorrente en relación con cada traballo para adxudicar non poderán ser contratados cando, no ano anterior a aquel en que van desenvolver o seu traballo ou nese mesmo ano, realízen ou realicen outros traballos para a entidade, sobre áreas ou materias respecto das cales deba pronunciarse o auditor no seu informe.

No exercicio das súas funcións de control, a Intervención Xeral da Comunidade Autónoma poderá acceder aos papeis de traballo que servisen de base aos informes de auditoría de contas do sector público da comunidade autónoma realizados por auditores privados.

Disposición adicional décimo oitava. *Fiscalización de expedientes do Fondo Galego de Garantía Agraria na xestión do Fondo Europeo de Garantía Agraria*

Os expedientes do Fondo Galego de Garantía Agraria nos que se exerza función de intermediación na xestión do Fondo Europeo de Garantía Agrícola, serán xestionados como operacións extra orzamentarias conforme ao sinalado no artigo 46.4 do Decreto legislativo 1/1999 do 7 de outubro polo que se aproba o Texto Refundido da Lei de réxime orzamentario e financeiro de Galicia. Sen prexuízo do anterior, todos actos e documentos de xestión deses expedientes susceptibles de producir dereitos e obrigas de contido económico ou movementos de fondos e valores, serán obxecto de fiscalización previa nos termos establecidos no artigo 95.1.a) do citado Decreto Legislativo 1/1999 do 7 de outubro.

Disposición adicional décimo novena. *O fondo de financiamento IFPP-Galicia*

Un. Créase o fondo de financiamento IFPP-Galicia como un fondo sen personalidade xurídica propia, para desenvolver ás xestións do instrumento financeiro creado ao abei-

ro do acordo de financiamento do instrumento financeiro de préstamos pemes Galicia FEDER 2014-2020.

Dous. O devandito fondo será xestionado polo IGAPE e contará cunha contabilidade separada da do ente instrumental, coa que presentará os seus estados orzamentarios e contables de xeito consolidado.

Tres. Os recursos asinados ao fondo e os seus rendementos deberán estar vinculados a unha conta operativa propia e separada das do IGAPE.

Catro. Mediante orde da Consellería de Facenda desenvolverase a súa operativa orzamentaria- contable e de rendición de contas. En todo caso estará sometido ao réxime de auditoría, control e rendición de contas que lle resulte aplicable ao IGAPE.

Disposición adicional vixésima. *Centralización da Tesourería do Consorcio Galego de Servizos de Igualdade e Benestar*

A consellería competente en materia de facenda poderá propoñer ao Consello da Xunta que as operacións de ingreso e de ordenación e realización material de pagamentos da entidade Consorcio Galego de Servizos de Igualdade e Benestar as realice a dirección xeral competente en materia de tesourería.